

續  
文  
獻  
通  
考

卷之一百十五

皇明進士雲間王圻纂輯

宗廟考 賢臣下 大臣家廟

賢臣下

遼

聖宗統和十六年以耶律休哥留守南京御宋有功詔立祠於南京以祀之

道宗清寧間以耶律曷魯佐太祖創業有功詔立祠于上京又以子質調和太后定世宗之位免穆宗于難有誅賊之功詔上京立祠祭享樹碑以紀之 壽隆五年以舊臣姚景行忠賢詔爲立祠

金

熙宗天眷中洪洞令劉徽柔斷叔殺姪事小民驚服爲立生祠

世宗大定間長社令張萬公諭土寇數萬人使不爲鄉里親戚害衆感悟相率而去邑人賴之爲立生祠

章宗明昌五年陳言者謂葉魯谷神二賢創制女直文字乞各封贈名爵建立祠廟令女直漢人諸生隨拜孔子後拜之有司謂葉魯難以致祭若金源郡貞獻王谷神旣以配享太廟亦難特立廟也有旨令再議之禮官言前代無創制文字入孔子廟故事如于廟後或左右置祠令諸儒就拜亦無害尚書省謂若如此未副國家厚

功臣之意遂詔令依倉頡立廟于盤屋側官爲立廟於上京

宣宗興定中王浩爲涇陽令廉白有善政去後民立生祠三年商衡爲威戎令開倉賑饑民慕其德去後爲立生祠又金末元多知民間利病所至稱治相棣順義政績尤著所至爲立祠張忠彥官至儀同三司卒時百姓哀號輟市立像祀之又完顏陳和尚死節于鈞州佗蒲胡土門死節于臨洮皆立像祀之廟曰褒忠

元

世祖時史天澤爲真定都帥有功于民及卒義士彭世和等構祠立像祀之號史丞相祠

憲宗時李德輝爲安西行省左丞卒蠻夷如哭私親廟祀之  
又董文炳將兵入閩志存不殺閩人立董忠獻祠  
崔斌從伯顏南征潭人之降者皆不殺人爲立生祠  
廉希憲爲荆南行省與利除害崇學教民民相與畫  
像建祠 姚天福爲湖北按察使教民楸藝皆致蕃富  
民立祠刻石以紀之 王約止征高麗人畫像立祠祀  
之 石珪守道齋也守山東諸路爲金人所得不屈因  
殺于市其麾下立祠兗州祀焉

成宗大德間建三賢祠于嘉興府治西北祀漢朱買臣唐  
陸贄宋傅舜俞宋知州李正己嘗建陳宣公祠而宣公  
祠舊有十所 時蓆縣人林士豪修葺董仲舒祠天曆

石縣尹呂思誠移于州治之東南便民崇祀 十年溫  
州建忠烈廟祀宋教授劉士英以諸生石礪配林景熙  
記畧曰宣和間睦寇猖獗守貳將棄城走教授霅州  
公士英館下生石礪畫守禦出奇計數挫賊鋒越五十  
六日王師至賊始驚遁劉後守太原會金虜犯城死于  
力戰卒全其節石辭祿不居以布衣終

武宗至大時建蛟峯祠于淳安祀宋儒方逢辰

仁宗皇慶元年建唐太子補闕薛令之祠于福安縣褒清  
德也 延祐二年重修明州董孝子廟孝子名黠漢和  
帝時人因母嗜慈溪水遷居其旁後遂成邑又殺王寄  
以報母仇屢徵不出時賜號純德徵君廟燬于至大時

至是復建 三年重修蘇州府三高祠宋時建祀范蠡  
張翰陸龜蒙 時興化總管張仲儀遷李長者祠于木  
蘭坡上長者名宏宋熙寧中傾貲築坡以溉田者也  
時寇犯吉安廬陵人羅明遠恢復郡城而死郡人立廟  
祀之 時福州總管張仲儀建錢聖妃廟錢氏捐十萬  
緡創木蘭坡以護田救民坡垂成而敗錢氏投水死故  
祀之

泰定帝泰定二年五月置諫議書院于昌平祀唐劉蕡至  
正十七年封爲文節昌平侯 致和元年四月改封唐  
柳州刺史柳宗元曰文惠昭靈公

明宗天曆元年十一月加謚唐司徒顏真卿爲忠烈文忠

公令有司以時祭祀 二年建周公廟在鳳翔府岐山之陽令有司春秋釋奠如孔子廟儀 至順元年八月賜伯夷叔齊廟額曰聖清每歲春秋祀以少牢 二年追封伯夷叔齊制畧曰讓爵以明長幼之序諫伐以嚴君臣之分昔居北海之濱遺廟東山之上休光垂于千載餘澤被於一方永懷孤峻之風庸示褒崇之典可追封伯夷爲昭義清惠公叔齊爲崇讓仁惠公

順帝元統二年南安縣尹劉昇火兒建朱文公祠于儒學明倫堂之右扁曰尊道堂 至元時德州判秦德用建四先生祠于學以祀宋范仲淹錢公輔孫覺洪興祖皆爲其有興學功也 重建二俊祠於松江祀陸機陸雲



兄弟 六年詔建曹南王阿剌罕及淮安王伯顏河南  
王阿木祠堂 至正時詔建木華黎伯顏祠于東平  
又重建四明賀知章祠初宋紹興間郡守莫將嘗建逸  
老堂祀知章元初堂廢以其地置驛至是郡得知章石  
像因祀于驛東 時游弘道爲化州路通判海寇犯境  
戰死邦人繪像祀于文廟側 時萬方李鉉守延平與  
寇戰沒追贈隴西郡公後人即其戰地立廟號隴西公  
廟 又台州總管達蕪善與方國珍戰死命立祠祀之  
賜額曰崇節 又連江寧善鄉巡檢劉濬爲江西賊王  
善斫其手指及兩腕兩足罵賊愈厲遂斷其喉舌以死  
立祠福州北門外有司歲時致祭 又漳州路達魯花

赤迭理迷實死節命建祠祀之賜額曰表忠 又崇寧  
縣尹彭庭堅禦寇有功累官福建宣慰司副都元帥後  
爲群盜所害民哀泣如喪父母立祠像歲時祭禱數降  
靈應旁邑立祠亦如之 又王伯顏知福寧州爲邵武  
賊王善所執挺頸受刃頸斷湧白液如乳暴屍數日色  
不變子相與婦潘氏及三女亦同死御史余闕以狀聞  
追封太原郡侯命本州立廟祀之賜額曰節孝廟 又  
江州總管李黼與徐壽輝力戰同姪秉昭皆死詔贈隴  
西郡公謚忠文立廟九江賜額崇烈 又建程明道伊  
川祠於博野縣 建鄭玄祠于菑川 十二年陳友定  
據閩逼閩人詹翰使從已翰固拒不從死之里人爲立

祠墓側 又浦江建李石二侯祠祀宋會稽李知退新  
昌石孝陔相繼爲賢令也 張珪尹南安救饑民立生  
祠祀之 十三年徐州民願建祠宇生祀右丞相脫脫  
從之 十五年買撒都剌蒞漳浦興利除害民立祠祀  
焉號買公祠 時鄞縣丁得孫知羅源簡詞訟興學校  
民立祠以祀 李士瞻以學士使閩諭海酋降服閩人  
德之立祠以祀 馬蒙古反爲西充縣主簿築堡壘禦  
寇民立祠祀之 文殊海涯監允溪縣廉介明敏士民  
感慕立祠于南溪書院 張昉爲南安路總管罷不急  
之務作石堤息水患民立祠祀之 賽典赤爲雲南行  
省平章有功德于民民祀之號咸陽王廟 呂盛爲四

川行樞密使有惠政邑人立廟祀之 陳祐守會稽有  
惠政遇盜而死父老請罾葬不得乃立祠祀之其子天  
祥知壽昌縱囚還家如期至白闔帥釋之民爲立生祠  
陳忠衛爲高要尹有德政卒于官民立祠祀之號太  
尉廟 泉州府有分憲赫德爾生祠有僉憲左達納失  
里生祠有達魯花赤僕王生祠有丞相高登祠有平章  
伯顏及其弟左丞烏馬兒棣萼聯輝之祠皆以有恩德  
于泉也 濟南府有水東行省張榮祠有陝西行臺御  
史中丞張養浩祠東平州有山東行臺嚴實祠皆有實  
惠及民民不能忘也 陳駭爲晉江令邑人德之立陳  
令尹祠 吳觀尹分寧民立祠以祀 王昌爲餘杭令

民刻石頌其功且塑像祀之 張世英爲廬氏尹勤于撫字民立祠祀之 史繼貞爲文登尹有德政民建祠祀之 綦泰張德新皆尹樂安有惠政民以配隋千乘尹蕭琅名三尹廟 張伯顏尹福寧革冗濫禁侵漁杜私謁修學校士民德之合王伯顏共祀名張王二州尹祠

時保定府有二賢祠祀劉因郝經 容城縣有劉靜修祠祀劉因 藁城縣學後有趙文正祠太保趙良弼嘗出私帑建藁城縣學卒後縣令建祠祀之 有王澤南祠澤南王若虛號也董王趙三氏勲閥子弟師若虛之賢而薰其德故建是祠吳澄有記 有安先生祠郡人

蘇天爵李士興爲鄉先生安熙建其祖湑父松咸在位  
焉歐陽玄作記山東章丘縣內有齊國公祠祀翰林

學士承旨劉敏中河南衛輝府有王公祠祀翰林學

士王昌齡河內縣有許文正公祠祀許衡鄉人慕其

道學而祀之新鄭縣乃其生地亦建祠焉湖廣大冶

縣有止齋先生祠縣尹周鏜建以祀鄉先生萬禎楊

州路高郵州有三賢祠祀郝經吳澄張瑄三人皆嘗客

寓高郵故祀之浙江慶元府有先賢祠祀宋李夷庚

豐稷陳瓘仇愈史詔林瞞林保史浩高閑汪大猷樓鑰

袁甫樓昉鄭清之及元袁楠也義烏縣有文獻公祠

祀黃潛皆至正時劉禎知瀘州即清穆書院故址建

祠繪像祀尹吉甫 益陽縣尹李忠建五賢祠祀屈原  
諸葛張詠張栻胡寅 新寧縣學有十先生祠縣尹李  
文淵荆蕭從周繼成之祀周敦頤程顥程頤張載邵雍  
司馬光朱熹張栻呂祖謙許衡 順德府有二賢祠總  
管王結所建祀唐魏徵宋璟 合肥縣有三賢祠祀宋  
包拯馬亮王希又增文翁余闕爲五賢 南文縣有宋  
忠臣王雲廟加封靈顯繼善公額曰利應 嵩縣治北  
建九賢祠祀周敦頤程顥程頤張載邵雍司馬光朱熹  
呂祖謙許衡

已上元末所建附此備攷

皇明

太祖吳元年 命建忠臣祠于鄱湖之康郎山 上謂中

書省臣曰崇德報功國之大典自古兵爭忠臣烈士以身殉國英風義烈雖死猶生予與陳友諒戰于鄱陽湖將臣效忠死敵昭然可數然有功不報何以慰死者之心而激生者之志哉爾中書其議行之於是中書省臣以死事之臣樞密院同知丁普郎樞密院判張志雄左副指揮使韓成統軍元帥宋貴陳兆先左副元帥余旭昌文貴右副元帥王勝李信陳弼劉義徐公輔同知元帥李志高元帥副使王咬住千戶姜潤石明王德朱鼎王清常德勝王鳳顯丁宇王仁汪澤王理陳冲裴軫王喜仙袁華史德勝鎮撫常推德曹信逯德山都尉鄭興



羅世榮等三十五人列進遂封勲爵有差建忠臣祠于  
康郎山設像其中令有司歲時祭之 又 命建忠臣  
祠于江西南昌府以平章趙德勝樞密判官李繼先右  
副指揮使劉齊統軍元帥趙國昭同知元師副使朱潛  
副使牛海龍千戶張子明張德山百戶徐明總管夏茂  
成江西省都事葉思誠洪都府知府葉琛臨江府同知  
趙天麟九十四人設像以祭之 重修吳公祠在常熟  
縣學祀子游故宅在縣西北有司二仲次丁日致祭  
三蘇祠在眉州治西南蘇洵故宅洪武間重修 陸將  
軍廟在松江府治西南至正間邑人立祠以祀陸遜陸  
凱及遜子抗洪武間定以春秋二祭宣德間遷於舊三

皇廟址 三高祠在吳江縣東門外祀越范蠡晉張翰  
唐陸龜蒙元延佑間重修 本朝載在祀典 焦光祠  
在鎮江府焦山祀漢隱士焦光 本朝有司歲時致祭  
顧野王廟在吳江縣治側 本朝有司歲一致祭  
五賢祠在南昌府舊在迎恩坊祀漢梅福陳蕃徐穉晉  
范甯唐韋丹五人宋徙於府學并賢牧爲兩祠 本朝  
合爲一祠增祀宋曾鞏熊凱元高納慶熊劬熊良輔包  
希魯熊復及 本朝陶安王莊朱善胡儼呂升十二人  
周公廟在鳳翔府岐山廟西北十五里洪武初重建  
泰伯廟在常州府洪武間重建載之祀典有 御製  
祭文 季子廟在常州府東南洪武初建 賜額曰嘉

賢有司歲時致祭又無錫西三十里亦有廟 司馬溫  
公廟在汝寧府光山縣洪武六年重建 宣聖廟在兗  
州府洪武九年修永樂十四年新之 御製碑文有司  
春秋致祭 伯夷叔齊廟在永平府舊府治西漆河之  
濱洪武九年遷城東北隅春秋仲月有司祭之 韓昌  
黎祠在昌黎縣西北洪武中建 四賢祠祀楊龜山羅  
豫章李延平朱晦菴洪武中重修 二忠祠在雲南府  
祀洪武間使臣王忠文公禔及尚書吳雲 三公祠在  
南寧府望仙坡上祀狄青孫沔俞靖洪武間修歲以重  
九日祭後配以邕守蘇緄及推官譚必 羅仲嘉祠在  
延平府沙縣西十里洞天巖西麓洪武中重修 義烈

廟在寧國府城北宋建炎中寇戚方圍宣城城隊將劉宴  
單騎與戰爲賊所害贈龍圖閣待制于死所立廟元毀  
洪武初脩 余忠宣廟在安慶府忠節坊祀元右丞余  
闕余爲元死節 本朝嘉其忠爲立廟有司歲時祭之  
推官黃大倫以下三十三人皆從闕死咸附祀 忠臣  
祠在建陽衛西 國初知府許瑗與行樞密院判王鼎  
共守太平寇至城陷瑗鼎被執罵賊而死踰月城復  
朝廷嘉之封其官立祠祀之 忠烈公祠在開州治東  
元郭嘉盡忠所事洪武初旌其忠烈 命有司立祠春  
秋致祭 甘卓廟在袁州萍鄉縣東五十里卓死於王  
敦之難 本朝重建春秋祭祀 許速廟在海寧縣西

五代梁初建後增祀唐中丞張巡宋併祀南霽雲雷萬  
春姚閻洪武初以海寧故搢官乃遠所生因獨祀遠

岳武穆王廟在杭州府治岳飛墓側 本朝 命有司

歲時致祭 靈衛廟在杭州府城西宋建炎間金兵犯

臨安錢塘令朱蹕暨二將金勝孔威率民兵力戰死之

本朝命有司立廟歲時致祭 褒烈廟洪武二年脩

祀宋宣州守李光 李龍遷廟在龍安府牛心山上有

墓龍遷稱藩於梁有惠于民洪武間 賜號龍陽李公

之神歲時致祭 旌忠廟在潼川州遂寧縣北祀後唐

東川節度使夏魯奇 本朝載在祀典 三公廟在成

都府治西南祀蜀太守秦李冰漢文翁宋張詠洪武中

重建 陳司徒廟在常州府東三里祀隋司徒陳果仁  
本朝命有司歲時致祭 漁滄廟在汀州府清流縣  
東臨漁滄潭祀唐銀青光祿大夫樊令之神 本朝命  
有司歲祭 三仁廟在衛輝府 比干廟在衛輝府城  
北俱 本朝重建每歲四月四日有司祭祀 濂溪先  
生祠在寧州旌陽山麓周敦頤主分寧簿創以延游學  
之士 本朝初卽其地建景濂書院弘治間督學邵寶  
肖像祀之 狄梁公廟在彭澤縣南四十里 本朝賜  
額曰唐司空梁國狄文惠公之廟春秋有司致祭 三  
先生祠在廣信府貴溪縣舊有陸象山祠 本朝重建  
增其兄九韶九齡爲三先生 止齋先生祠在武昌府

大冶縣學祀鄉賢萬禎 本朝重建 宋文憲廟在武昌府城東七里祀宋無忌 本朝重建 寇萊公祠在荊州府巴東縣西舊在江北 本朝定名荊州刺史謝晦廟祭以八月二十九日 屈原廟在湘陰縣北 本朝號曰楚三閭大夫屈平氏之神 命有司以五月五日致祭

成祖永樂中建文丞相祠於順天府學西元殺天祥於此旣而名曰教忠坊以旌異之歲時致祭正統間重修先賢祠在吉安府大成殿後祀唐陸元朗陸贄與宋王旦胡瑗富弼歐陽修富嚴蘇軾宋辰文尹焞王蘋滕茂實王煥陳長方李侗葉適范成大陸九淵楊簡魏了翁

周南倪千里陳豈趙希懌趙與立元亮程燿游顯甯王  
顏孟二氏祠 宗聖公祠 黃石公祠 子思祠在  
鄒縣南城外俱永樂七年重建 孟子廟在山東鄒縣  
永樂宣德年修弘治十年重建 朱文公祠在建寧府  
紫霞洲上永樂中建以文肅黃幹文簡劉燾文正蔡忱  
文忠真德秀配享 杜甫祠在萊陽縣北二里永樂中  
重修 諸葛亮廟在衡州府石鼓山永樂中重修 徐  
孺子祠在南昌府永樂中重修胡儼有記 范文正公  
祠在蘇州府治北仲淹義宅之東永樂中重修有司歲  
時致祭又有祠專祀仲淹與其子純仁純禮

仁宗洪熙中建方氏祠在寧海縣十一都祀 本朝方正



學孝孺父子歲春秋祭又卧龍山有方先生祠嘉靖初  
建祀孝孺父遜志

宣宗宣德中重修泰伯廟在蘇州府閭門內以延陵季子  
配享廟自唐始至是重修 陸宣公祠在嘉興府西舊  
有祠十所一在府學西南宋知州李正已建後廢宣德  
中重修有司歲時致祭 忠義廟在吉安府南大鵬里  
祀蕭必顯及死於陣者 忠烈廟在饒州府祀康保裔  
本朝宣德初重修魏驥有記 忠臣廟在康郎山祀  
本朝死事之臣張志雄等至是重修 武陽郡公廟在  
南昌府鐵柱宮祀唐觀察使韋丹按察使石璞奏爲立  
祠 忠節祠在吉安府治舊祀歐陽修楊邦義胡銓爲

三忠祠嘉定末又增周必大楊萬里爲四忠一節元燬  
本朝宣德中知府賈節改築于祥符寺左正統中知  
府陳本深繼成之又益以文天祥俱肖其像請以春秋  
仲月致祭李昌祺有記

英宗正統三年建忠毅祠在永昌軍民府大保山下祀都  
督方政時征麓川政率衆渡潞江力戰死節謚忠毅立  
祠祀之 文丞相祠在廬陵縣淳化鄉祀文天祥正統  
年建羅倫有記 杜甫祠在成都府浣花溪上正統年  
重建 胡安定祠在如皋縣學西正統初建 吳泰伯  
祠在嚴州府淳安縣東三十里宋咸淳中進士吳攀龍  
建正統中修 周濂溪祠在九江府廬山麓舊爲書院

正統初御史徐餘按察副使焦宏改祠肖像 匡丞相祠  
在山東正統七年重建祀匡衡 五賢祠在廬州府學  
舊有三賢祠在合肥縣學元建祀包拯馬亮王希呂正  
統初改建於此祀漢文翁元余闕爲五賢 二程祠在  
保定府博野縣東南二十五里元建祀程顥程頤正統  
中修 靜修祠在容城縣祀元儒劉因 尊賢祠在和  
州學內舊有張藉何蕃祠在學之東廡宋開禧初建正  
統三年修增祀彭思永沈立沈文通錢藻游酬魏玘張  
孝祥張孝伯龔楫蔣子春何宗英危素 李忠定祠在  
邵武府正統四年改建在府學東祀李綱 謝顯道廟  
在上蔡縣南門外正統五年因舊址建 二賢祠在常

州府城正統十年建祀蘇軾楊時以鄉宦周孚先恭先  
配享 常袞廟在閩縣治南正統十二年重建 鄭廣  
文祠在台州府治東祀唐台州司戶鄭虔虔常爲廣文  
館學士貶此正統十二年重建 森桂廟在温州府城  
西北祀宋郡人陳瑱兄弟 董永廟在德安府孝感縣  
治北正統中建 蘇雲卿祠在南昌府百花洲上正統  
七年建以配徐孺子

景皇帝景泰中建衛太師祠於蘇州府馬鞍山上祀宋衛  
涇 時以永豐知縣鄧顯死節配享於張叔夜祠祠在  
廣信府 元年重建顏真卿祠在山東濟南府 二年  
建馬周廟在東昌府在平縣學東南

英宗天順間建葉叅議祠於慶遠府祀府同知葉禎父子  
同死事故贈官祀之又建誠意伯廟在青田縣祀本  
朝名臣劉基

憲宗成化間重修孔融廟在萊州府增祀北海諸賢四  
年建黃忠宣公祠在昌邑縣南祀本朝尚書黃福  
齊太公桓公廟在青州府成化三年徙建於臨淄縣學  
北以魯仲連七賢配享春秋祀之五年建袁忠廟在  
漳州府城東祀元漳州路達魯花赤迭理彌實死節  
又立永康侯廟以衛青徐安生備倭有功祀之夏周  
二公祠在松江府治西南成化十五年建祀周文襄公  
忱嘉靖己丑增祀夏忠靖公原吉

孝宗弘治間立三功祠在湖州府玉磬山祀 本朝都御史張津巡按解冕金壇令劉天和時廣右賊亂三公有收復之功祠因以名歲春秋祭 二尚書祠在蘇州府胥門外弘治間建祀夏忠靖原吉周文襄忱 周文襄公祠在無錫縣慧山祀本朝巡撫周公忱 十六年建倉頡廟在壽光縣城西 五老祠在歸德府城埵澤門外祀杜衍王煥畢世長朱貫馮平弘治中建 胡先生祠在婺源縣東弘治中建祀元儒胡一桂 旌功祠在杭州府三臺山祀 本朝于肅愍公弘治中賜謚建祠歲春秋祭 章恭毅公祠在溫州府城竹馬坊祀 本朝侍郎章綸弘治末建 忠貞祠在瑞安縣西祀 本

朝戶部侍郎卓敬弘治中建

武宗正德中建忠節祠二一在杭州府城按察司東祀

本朝按察使王良一在杭州府筆架山方家峪祀宋大學士徐應鑣春秋致祭 大義祠在常山縣通衢門內正德末建祀正節先生徐應鑣 四先生祠在漢陽府治後祀周程張朱正德中增祀黃幹楊時 四忠祠在衡州府安仁縣東南三里正德中建祀南霽雲雷萬春周必大陳億孫 馬震祠在德安府城東北二十五里震都指揮正德六年霸州寇起震力戰死因卽其地建祠祀之 黃太常祠在分宜縣治右正德未建祀太常子澄因其故第創祠 王都御史生祠有四一在南安

府學一在南康二在上猶崇義各學內 楊侍郎祠在  
南安府管界都正德中建祀江西巡撫楊公寧以嘗征  
勦大庾黃寇兵不血刃民爭祀之 張鄧二守祠在南  
安府治西正德間建祀前守張弼鄧應仁 楊公祠在  
嘉興府學南祀 本朝知府楊繼宗正德十六年建歲  
春秋祭 萬公祠在瑞金縣治北正德中建祀知縣萬  
公金以其率兵禦流賊亡於陣也 忠節祠在 巖縣  
南祀 本朝沛縣令鄭恕及其二女正德年建

世宗嘉靖元年建楓山祠在蘭溪縣祀 本朝禮書章文  
懿公懋歲春秋祭萬曆二十六年巡按唐一鵬請額

賜名崇儒 又建許忠節公祠在武定州學內祀 本



朝兵備僉事許達 微子廟在歸德府嘉靖初徙建於  
府城內西南 顏魯公祠在歸德府城南嘉靖中因唐  
開元寺舊址建 陽明先生祠在餘姚縣龍泉山祀新  
建伯王守仁嘉靖十四年建 顯忠祠在奉化縣東告  
成寺塔下嘉靖初建祀 本朝拾遺戴德彞公死靖難  
師禍延宗黨 文節祠在貴池縣西祀宋通判趙昴發  
元兵攻城昴發與妻雍氏死節贈侍制謚文節雍贈順  
義夫人有司歲以三月望日致祭嘉靖初知府田賦以  
邑黃觀妻女同死忠事乃立雙忠六烈祠 褒忠廟在  
石埭縣祀宋制置使丁黼黻知成都與虜戰死嘉靖間  
後人鎔請立廟於此 旌忠祠在南昌府城進賢門內

祀忠臣孫燧許逵以馬思聰黃宏周憲宋以枋配嘉靖  
間勅建徐公生祠在德安府治東南祀知府徐貢元  
忠烈祠在餘姚縣南泉山南麓嘉靖二年建祀本  
朝禮書孫燧恭愍祠在臨海縣西北丹巖書院嘉靖  
四年建祀本朝賜光祿卿陳選遺愛祠在臨清州  
嘉靖十三年建祀知州夏鼎同仁祠在祥符橋畔嘉  
靖十七年建祀本朝孫燧王守仁胡世寧

今上萬曆初御史蔡夢說建李白祠於太平府之采石山  
表忠祠在武昌府治東萬曆二年巡撫趙賢建祀革  
除忠臣姚善廖昇樊士信周拱辰同仁祠在南昌府  
洪恩橋萬曆間重修祀孫燧許逵胡世寧伍文定王守

仁唐龍六人 王文成公祠在東昌府大忠祠右萬曆  
年重修祀新建伯王守仁 十五年重建黃司空廟於  
南昌府 是年重修南昌府澹臺廟 溫忠武廟在南  
昌府萬曆間重修陳文燭有記 二俊祠在松江府祀  
晉陸機陸雲宋端平年廢元至元間重修于府學東廡  
萬曆間重建於青浦縣治之南 忠肅公祠在杭州府  
少保于謙仕正統景泰間以死勤事卒謚肅愍萬曆中  
特嘉其節改謚忠肅賜祠於杭 十九年禮部覆奏寧  
夏遊擊梁琦死難宜建祠致祭奉 旨祠名顯忠 又  
覆奏寧夏守備馬承先死難宜立祠致祭奉 旨祠名  
顯忠 又奏寧夏常信堡百戶陳緒等死難宜建祠致

祭奉 旨祠名褒節 二十三年七月湖廣巡按徐兆  
魁奏提學僉事俞士章稱宋儒周敦頤父輔成名重制  
科行重士論乞 勅下禮部查照程珦朱松事例進輔  
成從祀啓聖庶海內士民仰見 皇上崇儒重道之典  
禮部覆請奉 旨周輔成准從祀啓聖祠 八月從太  
常寺奏祭宋丞相文天祥遣順天府堂上官行禮 二  
十四年八月禮部覆四川上司奏請漢將姜維立祠奉  
旨祠名與做靈佑各封號查照前代原官與他 二  
十六年建曾侍郎祠時巡按周盤奏曾銑謀國隕身立  
祠黃巖春秋祭祀給衣巾世守供祀 時禮部奏覆直  
隸提學御史陳子貞題郡邑學官設有鄉賢名宦二祠

要以風勵表勸庶幾高山景行之思第昔掌握於上之採訪今多有待於下之請乞原所由來則以近世政出多門事權不一提學官不得專主之故也夫提學官奉

天子璽書品藻才賢振揚風教一方文獻皆所提衡則名宦鄉賢之秩祀皆當屬之提學官今後依提學御史所請凡祀鄉賢名宦專屬提學官定奪別衙門不得越俎卽有批行該地方官仍轉詳提學官得允方許奉行提學官陞遷之日通將入祀姓名揭報部院部院查訪不公罪在提學官如此則職掌既專祀典益正大爲有裨風化奉 旨允行

張文獻及俞襄公祠在韶州府祀唐張九齡宋俞靖近

以唐刺史鄧文進配享 孫明復祠在濟南府以其徒  
石守道配享 周濂溪祠在道州 謝文節祠在九江  
府祀宋臣謝枋得 薛文清祠在平陽府祀 本朝禮  
部左侍郎兼翰林院學士薛瑄 熊去非祠在漳州府  
祀宋儒熊禾 道南祠在將樂縣祀宋儒楊時 子產  
廟祀鄭子產在懷慶府 王滹南祠在藁城縣學祀王  
若虛 三呂祠在西安府藍田祀宋寶文閣學士呂大  
忠及其弟大鈞大臨 橫渠祠在郿縣祀宋儒張載  
魏了翁祠在蘇州府祀宋叅知政事魏文靖公 英顯  
廟在沅州城東四十里以祀土人林公本朝有司春秋  
祭祀 二程祠在河南府 陳忠愍公祠在常州府城

雙桂坊尙書陳公治歿節交趾 詔建祠 正學祠

在金華府祀宋儒何基王栢元儒金履祥許謙四人

鄉賢祠在永寧司金州舊有祠後增祀宋守臣王堅及

安撫使張班 黃香廟在德安府南 本朝知府范理

建 鄒詹事徐贊善二祠在杭州府祀洪熙宮僚鄒濟

徐善達 褚公廟在仁和縣祀唐褚遂良 愍孝廟在

山陰縣祀宋孝子蔡定 華孝子祠在無錫縣慧山祀

齊華寶 孟孝感廟在武昌衛前祀吳孝子孟宗本

鎮遠侯廟在永南衛祀永樂中總兵顧成 王推官祠

在汀州府祀景泰中王得仁 褒忠祠在汀州府祀伍

驥丁泉 大節祠在南昌府高橋南祀靖難死事諸臣

黃子澄練子寧胡閏端王良周是修曾鳳韶鄒瑾王高  
彭與明魏冕蔡運顏伯瑋及其子有爲 賀叅政祠在  
寶慶府城東叅政賀興隆 本朝甲辰年任湖廣克寶  
慶與賊周文貴戰歿有 詔褒贈立祠祀之命有司歲  
以六月八日致祭 三忠祠在瓊州府祀宋文天祥陸  
秀夫張世傑 方忠靖祠在靖州治南州人以方死宸  
濠之難建祠祀之 懷忠祠在南昌府惠民門祀忠臣  
孫燧許逵卽其死難之所 忠節廟奉新縣東門外祀  
副史周憲吳一貫兩廡祀舍人周幹及征華林陣亡烈  
士 九忠祠在台州府大固山 祀本朝方孝孺葉惠  
仲王叔英徐屋鄭華盧元質鄭恕盧迥及東湖樵夫



旌忠廟在揚州府東宋紹興中統制王方魏全與金虜戰死立廟歲季春致祭 夏國公祠在貴陽府治南祀

本朝顧成 定遠王廟在雲南府王名晟卽沐英子

包孝肅公祠在肇慶府祀宋郡守包丞相拯 楊僉

都廟在廣州府祀 本朝僉都楊信民楊卒於廣東廣

人請立廟祀之 顯惠廟在延平府祀汀州刺史穆肅

陶學士祠在太平府希夷觀右祀學士陶安 忠烈

廟在溫州府祀宋敎授劉士英 忠惠祠在龍陽縣祀

縣尉青文勝 謝省祠在寶慶府城 本朝寶慶守有

惠政郡人祀之 吳淮祠在黃州府城隍廟前 本朝

黃州守有惠政郡人祀之 原御史祠在鄖陽府北原

名傑成化初撫三省得通民心故建祠祀之 曹端祠

在河南府渾池縣學內祀本朝蒲霍二州學正 卓太

傅祠在密縣祀漢循吏褒德侯卓茂 吳叅政生祠在

萬年縣祀吳廷舉湛若水有記 崔令祠在潞安府長

子縣祀唐縣令崔元靖 劉侯廟在蕭山縣祀漢郡守

劉寵 德惠祠在蕭山縣祀宋縣尹楊時及本朝魏尚

書驥 思賢祠在繁昌縣東祀知縣 有年 恭襄祠

在徐州城東 國朝平江侯陳瑄以治水有功祀之

胡文恭祠在武進縣東南四里 君山祠在江陰縣君

山祀 本朝同知張宗璉 任公祠在蘇州府名環山

西人由進士爲同知擊倭有功升僉事矢志滅賊積勞

成疾歸卒贈光祿卿蔭子副千戶立祠祀之 陳靖獻  
公祠在寧國府學東祀 本朝禮書陳迪春秋致祭  
程襄毅公祠在休寧縣南庵祀 本朝兵書程信 懷  
仁祠在章江門外祀都御史周如斗 仁政祠在本府  
學右祀巡撫劉光濟

以上皆本朝修建附此備攷

大臣家廟

宋

高宗紹興中立顏魯公祠于温州以魯公爲唐室忠臣悉  
官其後爲天下臣子勸令塑像而祀之蓋永嘉樂清顏  
氏皆魯公後也 又賜湖州顏魯公廟額曰忠烈用守

臣汪藻請也 又孔氏家廟在衢州府西宣聖四十八代孫襲封衍聖公端友從宋高宗南渡賜居衢州紹興六年詔權以衢州學爲家廟賜田奉祀

理宗寶慶三年卽莆田林氏所居立忠義祠祀林冲之父  
子冲之使金死其子郁遇兵變死從子寔詆和議亦廢  
放以成甫人號忠義林家至是立祠寶祐中又給田百  
畝以供祭享 景定三年正月賜賈似道第宅家廟  
元

世宗時中書令耶律楚材卒建祠於河南輝縣祀之

仁宗皇慶元年命河南省建故丞相阿木祠堂 六年建

晦菴先生祠于淳安祀宋儒朱文公

順帝至元六年徵  
州知州宇文傳復

建朱氏家廟以祀先文公文子又撥田以供祀  
寧又婺源縣建鄉賢祠亦祀文公

英宗至治元年建故太師魯公木華黎祠堂于東平

順帝至元六年詔建曹南王阿剌罕及淮安王伯顏河南  
王阿木祠堂 至正元年羅豫章五世孫天澤請建祠  
堂于沙縣杜溪里亦其故居也復建豫章羅文質公祠  
皇明

太祖洪武二年立滁陽王廟以祀郭子興至是又立廟墓  
次祀之以其鄰家宥氏世爲奉祀守王墳十六年冬十  
一月立楊王祠於墓次 命有司歲春秋祀之楊王  
淳皇后父陳某先是立祠 太廟東歲遣大臣祀已而  
中都守臣上言公塋地在下縣盱眙宜崇華表兼建廟

祠 太祖曰朕固聞之 命中書省建廟旰胎墓次樹  
神道碑令儒臣宋濂撰文仍設祠祭署及灑掃戶五家  
癸亥冬 勅立滁陽王廟碑於墓所先是廟成 上  
親稿王事實召太常司丞張來儀撰碑文稱王勇悍善  
戰惟不屈人下初元亂 上避兵入濠王識 上非常  
人遂以 孝慈皇后妻之且屬以兵事多密謀以故  
上起兵定天下王之力也後王卒歸葬滁州王夫人張  
氏生三子長戰沒次爲人所陷幼與羣小陰謀伏罪次  
夫人張氏生一女入爲 上妃生 蜀王 豫王 如  
意王洪武元年 上正大位追思更生恩實 帝業所  
始乃封爲滁陽王建廟墓所 命有司歲時率滁人祭

之至是 勅賜樹碑 是年立徐王廟於宿州王姓馬

孝慈皇后父也王缺嗣息至是追封爲王妻鄭氏爲

徐王夫人祠廟立於 太廟東以祭旣而稽古無文乃

卽王所生里立廟 命有司春秋祭之禮部陶凱撰文

立石仍設祠祭署以王鄰家武氏世爲奉祠守王墳灑

掃戶九十家 六年春詔定公侯以下家廟禮儀時禮

部官議奏云凡公侯品官別立祠堂三間於所居之東

以祀高曾祖考并祔位如祠堂未備奉主於中堂享祭

二品以上羊二豕二五品以上羊一豕一皆分四體熟

而薦之不能具牲者設饌享之所用器皿隨官品第稱

家有無祭之前二日主祭者聞於 上免朝叅凡祭四

仲之月擇吉日或春秋分冬夏至亦可前期一日主祭者致齋執事以灑掃祭所陳設儀如無親監宰牲是晚主嬪監造祭饌是夕主祭以下沐浴更衣宿於外舍明日率祭者盥洗訖詣祭堂捧正位祔位神主櫝各置於一盤令親子弟各一人捧至祭所主祭者開櫝捧各祖考神主主嬪開櫝捧各祖妣神主以安奉於位子弟捧祔食神主置于東西壁邊執事者進饌讀祝者一人就讀祝位贊禮以子弟親族爲之陳設各神位訖各就位主祭在東伯叔諸兄立於其前稍西諸親立於其後主婦在西諸母立於其前稍西嬪女立于其後讚拜主祭主嬪以下皆拜主祭者詣香案前跪三上香奠酒於高



祖考前由魯祖而下皆如之執事者酌酒於祔位前讀祝跪讀訖贊拜主祭復位與諸嬪皆再拜亞獻終獻亦如之惟不讀祝每獻執事者於祔位奠酌酒獻畢贊拜主祭嬪以下復再拜焚祝并紙錢於中庭禮畢主祭者安神主於櫝如初是日設進享祭饌男女異席餘胙分諸親友及下執事 制曰可 又建開平忠武王祠在通州城東南以祀常遇春正統十二年重修以燕山侯孫興祖配享

世宗嘉靖十五年夏言疏言天下臣民冬至日得祀始祖臣按宋儒程頤嘗修六禮大略家必有廟庶人立影堂廟必有主月朔必薦新時祭月令月冬至祭始祖立祭

祭先祖至朱熹纂集家禮則以爲始祖之祭近於偏上  
乃刪去之自是士庶家無復有祭始祖者臣愚以爲三  
代而下禮教衰風俗弊衣冠之族尚忘報本况匹庶乎  
程頤爲是緣情而爲指權宜以設教事逆而意順者也  
故曰人家能存得此等事雖幼者可使漸知禮儀也且  
禘五年一舉其禮最大此所謂冬至祭始祖者乃一年  
一行酌不過三物不過魚黍羊豕隨力所及特時享常  
禮焉爾禮不與禘同朱熹以爲僭而廢之亦過矣邇者  
面奏前事伏蒙 聖諭人皆有所本之祖情無不同此  
理當通於上下惟禮樂名物不可僭擬是爲有嫌奈何  
不令人各得報本追遠耶大哉 皇言至哉 聖心非

以父母天下爲王道者不及此也伏望 皇上詔令天下臣民議如程子之議冬至祭厥初生民之始祖立春祭始祖以下高祖以上之先祖皆設兩位于其席但不許立廟以踰分庶 皇上廣錫類之孝臣下無禘祫之嫌愚夫愚婦得盡報本追遠之誠矣 上是之 再閱

大明集禮 國朝品官廟制未定於是權倣朱子祠堂之制奉高曾祖禰之主于四仲月祭之又加臘日忌日之祭歲時俗節之薦享若庶人得奉其祖父母父母之祀已有著令而其時享于寢之禮略同于品官 又禮官疏請自周以上天子以至大夫士各有祖廟雖庶人亦各薦于寢至秦滅學斯禮乃失天子之外無敢有營

私廟者魏晉以降始復廟制許文武百官立家廟以官品爲所祀世次之差然位至通貴猶不管廟至有官爲立以愧之者有至勤詔旨切責者是豈獨禮教衰廢徂故習常哉亦由古今異儀封爵殊制事固有礙而當時禮官又不能講求典禮制爲定論使人有依據是以疑憚而不敢建立耳敢依倣古今酌爲中制以俟採擇謹按三代時有五廟三廟二廟一廟之制者以其有諸侯有卿大夫有上中下士之爵也今官職旣異且無家嫡世封之重又無山川國邑之常欲竊取古人之制而爲之所謂刻舟膠柱矣漢爲曹公立五廟晉爲安昌公立六廟後魏爲胡珍立五廟至北齊以下以從二品以上

祀五代五品以上祀三代七品以上祀二代或五廟四廟三廟二廟一廟皆不可行至宋程頤始約之而歸于四世上自公卿下及士庶莫不皆然其言曰自天子至於庶人五服皆至高祖服既如此則祭亦須如此若止祭禰是知母而不知父非人道也朱熹以爲得祭祀之本意禮大夫有事省於其君子祿及其高祖此可謂立三廟而祭其高祖之驗由是觀之則廟雖有多寡而祭皆及四親則一也以是差之則莫若官自三品以上爲五廟以下皆四廟爲五廟者亦如唐制五間九架厦兩旁隔版爲五室中祔五世祖旁四室祔高曾祖禰爲四廟者三間五架中爲一室祔高曾左右爲二室祔祖禰

若當祀始祖先祖則如朱熹所云臨祭時作紙牌祭訖  
焚之然三品以上雖得爲五廟若上無應立廟之祖不  
得爲世祀不遷之祖惟以第五世之祖奉爲五世只名  
曰五世祖必待世窮數盡則以今之得立廟者爲世祀  
之祖世祀而不遷焉四品以下無此祖也惟四世遞遷  
而已至于牲宰俎豆等物惟依官品而設不得同也蓋  
古者於四親之廟有日祭月祀時享數疏之不同今不  
可考然而皆在祭中不可缺廢則貴賤一也是以因其  
可知而缺其所不可知是亦厚于孝養而不爲過也若  
夫庶人祭於寢無可說矣伏乞 詔令天下使小大士  
庶皆得據而爲之凡唐宋以來一切三廟二廟一廟四

世三世二世一世之制繁雜破碎多礙而少通者一切  
除去之以五室四室爲率庶幾三代之制程朱之義通  
融貫徹並行不背矣從之 二十八年大同總兵張達  
討總兵林椿死于俺答之難 詔贈官賜謚立祠祀之  
穆宗隆慶四年 詔祀 太子少保禮部尚書兼翰林院  
學士歐陽德於鄉時江西撫按官言德文章行業爲世  
所重其門人後學相與祀之宜 詔有司歲時舉祀以  
從人望禮部覆請 上特允之

續文獻通考卷之一百十五終

續文獻通考卷之一百十六

皇明進士雲間王圻纂輯

王禮考 朝儀

宋遼

宋

理宗寶慶二年十一月日南至御大慶殿受朝畢詣慈明殿 三年天基聖節羣臣上壽于垂拱紫宸殿 紹定元年春正月御文德殿羣臣朝賀發冊寶于大慶殿上率羣臣上壽明慈睿皇太后尊號于慈明殿歲歲如之 四年十二月詔正旦大朝會權免 端平二年十一月日南至羣臣朝賀 景定元年七月御大慶殿冊皇太子羣臣班賀



上皇太后冊寶儀 寶慶二年十二月詔皇太后宜上尊號曰壽明皇太后有司詳具儀注朕當親率羣臣詣慈明殿奉上冊寶甲申以史彌遠爲奉上皇太后尊號冊寶禮儀使并撰冊書冊宣繒篆寶 紹定三年十二月詔曰壽明慈睿皇太后載安宗社兼體乾坤宜加上尊號曰壽明仁福慈睿皇太后其令有司詳具儀注朕當親率羣臣詣慈明殿奉上冊寶

度宗咸淳三年詔朕纂承丕緒郊見禮備載典冊皇太后合上尊號可令有司討論以聞宰執奏皇太后尊號恭擬壽和二字詔於五年加上壽和皇太后尊號曰壽和聖福皇太后

冊皇后儀 紹定三年十一月詔皇妃謝氏立爲皇后  
令有司擇日降制 丙辰以薛極撰冊葛洪書冊同知  
樞密院事袁紹篆寶十二月御文德殿冊皇后

冊皇太子儀 景定元年詔皇子忠王可立爲皇太子  
令有司討論典禮以聞 甲寅詔皇太子改名令所司  
備禮冊命尋賜字曰長源乃以賈似道爲禮儀使朱習  
撰冊文皮龍榮書冊沈炎篆寶 乙卯上曰皇太子入  
儲宮禮宜從厚如賜宴錫賚等事皆當討論似道奏舊  
典有諸王入府錫宴及皇太子宴宮僚于資善堂賜教  
坊樂之類今日倣而行之足稱盛典

皇太子冠儀 寶祐二年詔皇太子年方志學儼若成

人節屈履長欲行冠禮令有司討論典故以聞 十月  
詔皇子忠王冠禮以徐青叟爲賓師珍主之 十一月  
上御文德殿行皇子忠王冠禮賜字邦壽

遼

穆宗初卽位詔朝會依嗣聖皇帝故事用漢禮

正旦朝賀儀 臣僚并諸國使昧爽入朝奏班齊皇帝  
升殿坐契丹舍人殿上通訖引契丹臣僚東洞門入引  
漢人臣僚并諸國使西洞門入合班舞蹈五拜鞠躬平  
身引親王東階上殿欄內褥位俛伏跪自通全銜臣某  
等祝壽訖伏興退引東階下殿復位舞蹈五拜畢鞠躬  
宣徽使殿上鞠躬奏臣宣答稱有勅班首以下聽制訖

再拜鞠躬宣徽傳宣云履端之慶與公等同之舍人贊  
謝宣諭拜舞蹈五拜贊各祗候分班引出引班首西階  
上殿奏表目訖教坊起居賀十二拜畢贊各祗候引契  
丹漢人臣僚并諸國使東西洞門入合班再拜贊進酒  
引親王東階上殿就欄內褥位搢笏執臺琖進酒訖退  
復褥位置臺琖出笏少前俛伏自通全銜臣某等謹進  
千萬歲壽酒俛伏興退復褥位與殿下臣僚皆再拜鞠  
躬俟宣徽使殿上鞠躬奏臣宣答稱有旨親王以下再  
拜如初儀傳宣云飲公等壽酒與公等內外同慶舍人  
贊謝宣諭如初贊各祗候親王搢笏執臺琖殿下臣僚  
分班皇帝飲酒教坊奏樂殿上下臣僚皆拜呼萬歲贊

各祗候樂止教坊再拜皇帝卒飲親王進受璣復褥位  
置臺璣出笏揖臣僚合班引親王東階下殿復位鞠躬  
再拜贊各祗候分班引出皇帝起詣皇太后殿臣僚并  
諸國使皆從皇太后升殿皇后東方側坐引契丹漢人  
臣僚并諸國使兩洞門入班稱賀進酒皆如皇帝之儀  
畢引出教坊入起居進酒亦如之皇太后宣答稱聖旨  
契丹班謝宣宴上殿就位立漢人臣僚并諸國使東洞  
門入丹墀東方面西鞠躬舍人鞠躬通文武百僚宰臣  
某以下謝宣宴再拜出班致詞訖退復位舞蹈五拜贊  
各上殿祗候引宰臣以下并諸國使副方裊朵殿臣僚  
西階上殿就位立不應坐臣僚並於西洞門出二人監

琰教坊再拜贊各上階下殿謝宴如皇太后生辰儀  
冬至朝賀儀 臣僚齊班如正旦儀皇帝皇后拜日臣  
僚陪位再拜皇帝皇后升殿坐契丹舍人通臣僚入合  
班親王祝壽宣答皆如正旦之儀謝訖舞蹈五拜鞠躬  
出班奏聖躬萬福復位再拜鞠躬班首出班俛伏跪祝  
壽訖伏興舞蹈五拜鞠躬贊各祗候分班不出合班御  
牀入再拜鞠躬贊進酒臣僚平身引親王左階上殿就  
欄內褥位搢笏執臺琰進酒皇帝皇后受琰訖退就褥  
位置臺琰出笏俛伏跪少前自通全銜臣某等謹進千  
萬歲壽酒俛伏興退復褥位再拜鞠躬殿下臣僚皆再  
拜鞠躬宣答如正旦儀親王搢笏執臺琰分班皇帝皇

后飲酒奏樂殿上下臣僚皆拜稱萬歲壽樂止教坊再拜臣僚合班親王進受琖至褥位置臺琖出笏引左階下殿出御牀親王復丹墀位再拜鞠躬贊祇候分班引出班首右階上殿奏表目進奏諸道進奉教坊進奉過訖贊進奉收班首舞蹈五拜鞠躬贊各祇候班首出臣僚復入合班謝舞蹈五拜鞠躬贊各祇候分班引出聲警皇帝皇后起赴北殿皇太后于御容殿與皇帝皇后率臣僚再拜皇太后上香皆再拜贊各祇候可矮墩以上上殿皇太后三進御容酒陪位皆拜皇太后升殿坐皇帝就露臺上褥位親王押北南臣僚班丹墀內立皇帝再拜臣僚皆拜鞠躬皇帝欄內跪祝皇太后壽記復

位再拜凡拜皆稱萬歲贊各祗候臣僚不出皇帝皇后側坐親三進酒臣僚陪拜皇太后宣答皆如正旦之儀臣僚分班不出班首右階上殿奏表目合班謝宴宴上殿就位如儀御牀入皇帝進皇太后酒如初各就坐行酒宣飲盡如皇太后生辰之儀皇后進酒如皇帝之儀三進酒行茶教坊致語行殺饌大饌七進酒曲破臣僚起御牀出謝宴皆如皇太后生辰儀

常朝起居儀 昧爽臣僚朝服入朝各依幕次內侍奏班齊先引京官班于三門外當直舍人放起居再拜各祗候依次兩府以下文武官於丹墀內面殿立監班諸司并供奉官于東西道外相向立定當直閣使副贊放



起居再拜各祗候退還幕次公服帝升殿坐兩府并京  
官丹墀內聲喏各祗候教坊司同北班起居畢奏事  
燕京就嘉寧殿西京就同文殿朝服以幘頭袍服公服  
以紫衫帽

正座儀 皇帝升殿座警聲絕契丹漢人殿前班畢各  
依位侍立次教坊班畢捲退京官班入拜畢揖于右橫  
階西依位班立次武班入拜畢依位立文班入拜畢依  
位立北班入起居畢於左橫街東序班立次兩府班入  
鞠躬通宰臣某官以下起居拜畢引上殿奏事

已上六班起居並七拜內有不帶節度使班首止通名  
亦七拜捲班與常朝同直院有旨入文班留守司三司

統軍司制置使謂之京官都部署司宮使副都丞以下  
令史北面主事以下隨駕諸司爲武官館閣大理寺堂  
後以下御史臺隨駕閒員令史天臺翰林醫官院爲文  
官

皇帝生辰朝賀儀 臣僚國使班齊皇帝昇殿坐臣僚  
使副入合班稱賀合班出皆如皇太后生辰儀中書令  
北大王奏諸道進奉表目教坊起居七拜臣僚東西門  
入合班再拜贊進酒班首上殿進酒宣徽使宜答羣臣  
謝宣諭分班奏樂皇帝卒飲合班班首下殿分班出皆  
如正旦之儀進奉皆如皇太后生辰儀皇后詣太后殿  
近上皇族外戚大臣並從奉迎太后卽皇帝殿坐皇太

后御小輦皇帝輦側步從臣僚分行序引宣徽諸司閣  
門攢隊前引教坊動樂控鶴起居四拜引駕臣僚並於  
山樓南方立候皇太后入閣揖使副并臣僚入幕次皇  
太后升殿坐皇帝東方側坐引契丹漢人臣僚使副兩  
洞門入合班起居舞蹈五拜贊各祗候面殿立皇帝降  
御座殿上立進皇太后生辰物過畢皇帝殿上再拜殿  
上下臣僚皆拜皇帝升御座引臣僚分班出契丹臣僚  
入謝宣宴漢人臣僚使副入通名謝宴上殿就位不應  
坐臣僚從人入皆如儀御牀入皇帝初進皇太后酒皇  
太后賜皇帝酒皆如皇太后生辰儀贊各就坐行酒宣  
飲盡就位謝如儀殿上一進酒畢從人入就位如儀親

王進酒行餅茶教坊致語如儀行茶行殺饌如儀七進酒使相樂曲終從人起曲破羣僚使副起餘皆如正旦之儀

皇太后生辰朝賀儀 至日臣僚入朝國使至幕班齊如常儀皇太后升殿坐皇帝東面側坐契丹舍人殿上通名契丹漢人臣僚宋使副綴翰林學士班東西兩洞門入合班稱賀班首上殿祝壽分班引出皆如正旦之儀教坊起居七拜契丹漢人臣僚入進酒皆如正旦之儀惟宣答稱聖旨皇帝降御座進奉皇太后生辰禮物過畢皇帝殿上再拜殿下臣僚皆再拜皇帝升御座引臣僚分班出引中書令北大王西階上殿奏契丹臣僚

進奉次漢人臣僚并諸道進奉控鶴官置擔牀起居四拜畢引進使鞠躬通文武百僚某官某以下高麗夏國諸道進奉宜徽使殿上贊進奉各付所司控鶴官聲喏擔牀過畢契丹漢人臣僚以次謝五拜贊各祇候引出教坊諸道進奉使謝亦如之契丹臣僚謝宣宴引上殿就位立漢人臣僚并宋使副東洞門入面西謝宣宴如正旦儀贊各上殿祇候臣僚使副上殿就位立亦如之監琰教坊上殿從人入東廊立皆如之御牀入皇帝初進酒臣僚就位陪拜皇太后飲酒殿上應坐侍立臣僚皆拜稱萬歲贊各祇候立皇太后卒飲手賜皇帝酒皇帝卒飲退就褥位再拜臣僚皆陪拜若皇帝親賜使相

臣僚宋使副酒皆立飲皇帝升坐贊應坐臣僚并使副  
皆拜稱萬歲贊各就坐行方褥朵殿臣僚酒如正旦儀  
一進酒兩廊從人拜稱萬歲各就坐親王進酒如正旦  
儀若皇太后手賜親王酒跪飲訖退露臺上五拜祇候  
候殿上三進酒行餅茶訖教坊跪致語揖臣僚使副廊  
下從人皆立口號絕贊拜亦如之行茶行般餽皆如之  
大饌入行粥盃殿上七進酒使相臣僚樂曲終揖廊下  
從人起拜稱萬歲各好去承受官引兩門出曲破揖臣  
僚使副起鞠躬贊拜稱萬歲贊各祇候引臣僚使副下  
殿契丹臣僚謝宴畢出漢人臣僚使副舞蹈五拜畢贊  
各好去出洞門畢報閣門無事皇太后皇帝起凡五

拜者拜興再拜興跪播笏三舞蹈三叩頭出笏就拜興  
拜興再拜興其就拜亦曰俛伏興 賓儀臣僚皆曰坐  
於此儀曰高褊與方褊別

皇后生辰朝賀儀 臣僚昧爽朝皇帝皇后大帳前拜  
日契丹漢人臣僚陪拜皇帝升殿坐皇后再拜臣僚殿  
下合班陪拜皇帝賜皇后生辰物禮皇后殿上謝再拜  
臣僚皆拜契丹舍人通名契丹漢人臣僚以次入 員琰  
人舍人贊舞蹈五拜起居不表聖躬萬福贊再拜班首  
上殿拜跪自通全銜祝壽訖引下殿復位鞠躬贊舞蹈  
五拜贊各祗候引宰臣一員上殿奏百僚諸道進表目  
教坊起居七拜不賀控鶴官起居四拜諸道押衙附奏

起賜宴共八拜契丹漢人合班進壽酒舞蹈五拜引大臣一員上殿欄外褥位搢笏執臺琰進酒皇帝皇后受琰退復褥位授臺出笏欄內拜跪自通全銜祝壽臣等謹進千萬歲壽酒訖引下殿復位舞蹈五拜鞠躬宣徽使奏宣答如儀引上殿搢笏執臺皇帝皇后飲殿下臣僚分班教坊奏樂皆拜稱萬歲卒飲皇帝皇后授琰引下殿舞蹈五拜贊各祗候引出臣僚進奉如儀宣宴如儀教坊監琰臣僚上殿祗候如儀皇后進皇帝酒殿上贊拜侍臣僚皆拜皇帝受琰皆拜皇后坐契丹舍人漢人閣使殿上贊拜皆拜稱萬歲贊各就坐大臣進皇帝皇后酒行酒如儀酒三行行散行饌又進皇帝皇后酒



酒再行大饌入行粥教坊致語臣僚皆起立口稱絕賛拜稱萬歲引下殿謝宴引出皆如常儀

臣僚接見儀 皇帝御座奏見榜子畢臣僚左入鞠躬通文武百僚宰臣某官以下祇候見引面殿鞠躬起居凡七拜引班首出班謝面天顏復位舞蹈五拜鞠躬宣答問制再拜宣訖謝宣諭五拜各祇候畢可矮墩以上引近前問聖躬萬福傳旨問跋涉不易鞠躬引班舍人賛各祇候畢引右上準備宣問其餘並於右侍立 宣答云卿等久居鄉邑來奉乘輿時屬霜寒或云炎蒸諒多勞止卿各平安好想宜知悉

宰相中謝儀 皇帝常服升殿坐諸班起居如常儀應

坐臣僚上殿其餘臣僚殿下東西序立皆如宋使初見之儀引中謝官左入至丹墀面西立舍人當殿鞠躬通新受具官姓名祇候中謝宣徽殿上索通班舍人就贊禮位贊其官至宣徽贊通班舍人二人對立揖中謝官鞠躬贊就拜位舍人二人引面殿鞠躬贊拜中謝官舞蹈五拜不出班奏聖躬萬福贊再拜揖出班跪叙官致詞訖俛伏興復位贊拜舞蹈五拜又出班中謝致詞如初儀共十有七拜贊祇候引右階上殿就位揖應坐臣僚聲喏坐供奉官行酒傳宣飲盡臣僚搢笏執琖起位後立飲置琖出笏贊拜臣僚皆再拜贊各坐搢笏執琖授供奉官琖酒三行揖應坐臣僚聲喏立引中謝官右

階下殿至丹墀面殿鞠躬贊拜舞蹈五拜引右出臣僚皆出丞相樞密使同餘官不升殿賜酒不帶節度使不通班止通名七拜衆謝班首一人出班中謝

拜表儀 其日先于東上閣門陳設壇位分引南北臣僚諸國使副于壇位合班通事舍人二人舁表案置班首前揖鞠躬再拜平身中書舍人立案側班首跪播笏興捧表跪左膝以表授中書舍人出笏就拜興再拜中書舍人復置表案上通事舍人舁表案于東上閣門入捲班分引出禮畢

元日皇帝不御坐行此儀餘應上表有故皆倣此

立春儀 皇帝出就內殿拜先帝御容北南臣僚丹墀

內合班再拜可矮墩以上入殿賜坐帝進御客酒陪位  
并侍立皆再拜一進酒臣僚下殿左右相向立皇帝戴  
幡勝等第賜幡勝臣僚簪畢皇帝于土牛前上香三奠  
酒不拜教坊動樂侍儀使跪進綵杖皇帝鞭土牛可矮  
墩以上北南臣僚丹墀內合班跪左膝受綵杖起再拜  
贊各祗候司辰報春至鞭土牛三匝矮墩鞭止引節度  
以上上殿撒穀豈擊土牛撒穀豈許衆奪之臣僚依位  
坐酒兩行春盤入酒三行畢行茶皆起禮畢

重五儀 至日臣僚昧爽起御帳皇帝繫長壽綵纓升  
車坐引北南臣僚合班如丹墀之儀所司各賜壽纓揖  
臣僚跪受再拜引退從駕至膳所酒三行若賜宴臨時

聽勅

重九儀 北南臣僚旦赴御帳從駕至圍場賜茶皇帝就坐引臣僚御前班立各賜菊花酒跪受再拜酒三行揖起

太宗會同四年十一月以永寧天授二節及正旦重午冬至臘並受賀著爲令

再生禮 皇帝本命前一年季冬之月擇吉日前期禁門除地地置再生室母后室先帝神主輿在再生室東南倒植三岐木其日以童子及產醫媼置室中一婦人執酒一叟持矢簋立於室外有司請神主降輿致奠奠訖皇帝出寢殿詣再生室羣臣奉迎再拜皇帝入室釋

服跣以童子從三過岐木之下每過產醫媼致詞拂拭  
帝躬童子過岐木七皇帝臥木側叟擊箠曰生男矣太  
巫幪皇帝首興羣臣稱賀再拜產醫媼受酒于執酒婦  
以進太巫奉祿襁綵結等物贊祝之預選七叟各立御  
名繫於綵皆跪進皇帝選嘉名受之賜物再拜退羣臣  
皆進襁祿綵結等物皇帝拜先帝御容遂宴羣臣  
史臣曰善哉阻午可汗之垂訓後嗣也孺子無不慕其  
親者嗜欲深而愛淺妻子具而孝衰人人皆然而況天  
子乎再生之儀歲一周星使天子一行是禮以起其孝  
心夫體之也真則其思之也切孺子之慕將有油然而發  
于中心者感發之妙非言語文字之所能及善哉阻午

可汗之垂訓後嗣也使之以三過岐木母氏劬勞能無念乎終之以拜先帝御容敬承宗廟宜何如哉

賀祥瑞儀

聲警北南臣僚金冠盛服合班立班首二

人各奉表賀北南宜徵使左階下殿受表上殿授讀表大臣讀訖揖殿下臣僚鞠躬五拜畢鞠躬引班首二人左階上殿欄內拜跪稱賀致詞訖引左階下殿復位五拜畢鞠躬宣客聽制訖再拜鞠躬宣諭五拜畢各祇候分班侍立禮畢兩府奏事如天祚帝乾統六年木葉山瑞雲見始行前儀天禮畢奏事與前徵後趙王進酒教坊動樂臣僚酒禮畢奏事與前徵不同

賀平難儀 皇帝皇后升殿坐北南臣僚并命婦合班  
五拜揖班首二人出班俛跪稽首執表舁案近前閣使  
受表置案上皆再拜通事舍人二人舁案左階上殿置  
露臺上讀表官受入讀表對御讀訖臣僚殿下五拜鞠躬  
引班首二人左右階上殿欄內並立先引北面班首  
少前跪致詞訖退復褥位次引南面班首亦如之畢分  
引左右階下殿復位五拜鞠躬宣徽稱有勅再拜宣答  
內難已平與公等內外同慶謝宣諭五拜捲班臣僚從  
皇帝命婦從皇后詣皇太后殿見先帝御容陪位皆再  
拜皇太后正坐稱賀共十拜並引上殿賜宴如儀 道  
宗清寧元年太叔重元謀逆仁懿太后親帥衛士與逆



黨戰事平因制此儀

皇帝受冊儀 前期一日尚舍奉御設幄于正殿北牖  
下南面設御坐奉禮郎設官僚客使幕次于東西朝堂  
大樂令設宮懸於殿庭舉麾位在第二重西階上東向  
乘黃令陳車輅尚輦奉御陳輿輦尚舍奉御設解劔席  
于東西皆設文官六品以上位橫街南東方西向武官  
五品以上位橫街南西方東向皆北上重行每等異位  
將士各勒所部六軍伏屯諸門金吾伏黃麾仗陳于殿  
庭至日押冊官引冊自西便門入置冊案西階上通事  
舍人引侍從班入就位侍中東階下解劔履上殿欄下  
俛伏跪奏中嚴下殿劔履復位立閣使西階上殿欄外

跪請木契面殿鞠躬奏奉勅喚伏殿中監少監殿中丞等押金吾四色仗入位臣僚後協律郎入就舉麾位符寶郎詣閤奉迎通事舍人引文官四品至六品武官三品至五品就門外皇帝御輦至宣德門宣徽使押內諸司班起居引皇帝至閤服袞冕侍中東階下解劒履上殿版奏外辦太常博士引太常卿太常卿引帝內諸司出協律郎舉麾太樂令令撞黃鍾之鐘左五鐘皆應工人鼓祝樂作皇帝卽御坐宣徽使贊扇合樂止贊簾捲扇開符寶郎奉寶進左右金吾報平安通事舍人引文官三品武官二品以上合班北向東班西上西班東上起居七拜分班各復位通事舍人引押冊官押冊自西

階下至丹墀當殿置香案冊案置冊訖樂作就位樂止  
捧冊官近後東西相對立舍人引侍從班并南班合班  
北向如初贊再拜在位者皆再拜舞蹈五拜分班各復  
位如初捧冊官就西階下解劔席解劔履捧冊西階上  
殿樂作置冊御坐前東西立北向捧冊官西階下立北  
上樂止讀冊官出班當殿立贊再拜山呼萬歲就西階  
下解劔席解劔履西階上殿欄內立當御坐前侍中取  
冊捧冊官捧冊匱至讀冊官前跪相對捧冊讀冊官俛  
伏跪讀訖俛伏興捧冊官跪左膝以冊授侍中侍中受  
冊以冊授執事者降自西階劔履訖復當殿位贊再拜  
三呼萬歲復分班位舍人引侍從班南班合班北向如

初贊拜在位者皆拜舞蹈鞠躬如初通事舍人引班首  
西階下解劔履上殿樂作就欄內位樂止俛伏跪通全  
銜臣某等致詞稱賀訖俛伏興降西階下帶劔納舄樂  
作復位樂止贊拜在位者皆再拜舞蹈五拜鞠躬侍中  
臨軒西向稱有制皆再拜侍中宣答訖贊皆再拜舞蹈  
五拜分班各復位三品以上出樂作出門畢樂止侍中  
當御坐俛伏跪通全銜奏禮畢俛伏興退東階下殿帶  
劔納履復位宣徽使贊扇合下簾太常博士太常卿引  
皇帝起樂作至閣樂止舍人引文官四品武官三品以  
下出門外分班立次引侍從班出次兵部吏部出次金  
吾出次起居郎舍人出次殿中監少監押金吾細仗出

仍位臣僚後次東西上閤門使于丹墀內鞠躬奏衙門  
無事捲班出閤門使丹墀內鞠躬揖奉勅放仗出門外  
文武班中間立喚承受官承受官聲喏至閤門使後鞠  
躬揖閤門使鞠躬稱奉勅放仗聲絕趨退文武合班再  
拜舍人一員攝詞令官殿前鞠躬揖稱奏勅放黃麾仗  
出放金吾仗亦如之翌日文武臣僚入問聖躬

按太平元年行此儀大畧遵唐晉舊儀又有上契丹冊  
儀以阻午可汗行柴冊禮合唐禮雜就之也又有上漢  
冊儀與此儀大同小異加以上寶儀耳

冊皇太后儀 前期陳設于元和殿如皇帝受冊之儀  
至日皇帝御弘政殿冊入侍從班入門外金吾列班文

武分班侍中解劔奏中嚴宣徽使請木契喚仗皆如之  
樂上入閣使門外文武班中間立喚承受官聲喏趨至  
閣使後立閣使鞠躬立揖稱奉勅喚仗承受官鞠躬聲  
喏揖引聲奉勅喚仗文武合班再拜殿中監押仗入文  
武班入亦如之宣徽使同內諸司供奉官天橋班候皇  
太后御紫宸殿乘平頭輦童子女童隊樂引寶金鑾門  
間使奏內諸司起居訖贊引駕自下先引至元和殿皇  
太后入西北隅閣內更衣侍中解劔上殿奏外辦宣徽  
受版入奏侍中降復位協律郎舉麾樂作太樂令太常  
卿道引皇太后升坐宣徽使贊扇合捲簾扇開樂止符  
寶郎奉寶置皇太后坐右左右金吾大將軍對揖鞠躬

奏軍國內外平安東上閣門副使引丞相東門入西閣  
門副使引親王西門入通事舍人引文武班入如儀樂  
作至位樂止文武班趨進相向再拜退復位東西上閣  
門使宣徽使自弘政殿引皇帝御肩輿至西便門下引  
入門樂作至殿前位樂止皇帝拜舞蹈拜訖引西階上  
殿至皇太后坐前位俛跪致詞訖俛伏興引西階下至  
殿前位拜舞蹈拜鞠躬侍中臨軒宣太后答稱有制皇  
帝再拜宣訖引皇帝上殿樂作至西閣樂止丞相親王  
從文武合班再拜舞蹈三呼萬歲如儀丞相上賀侍中  
宣答如儀丞相以下出舉樂出門樂止侍中奏禮畢宣  
徽索扇扇合下簾皇太后起舉樂入閣樂止文武官出

門外分班侍從兵部吏部起居金吾仗出如儀閣使奏  
於仗皆如皇帝受冊之儀

納后儀 擇吉日至日后族畢集詰旦后出私舍坐于  
堂皇帝遣使及媒者以牲酒饗餼至門執事以告使及  
媒者入謁再拜平身立少頃拜進酒于皇后次及后之  
父母宗族兄弟酒徧再拜納幣致詞再拜訖后族皆坐  
楊隱夫人四拜請就車后辭父母伯叔父母兄各四拜  
宗族長者皆再拜皇后升車父母飲后酒致戒詞徧及  
使者媒者送者發軔伯叔父母兄飲后酒如初教坊遮  
道贊祝后命賜以物后族追拜進酒遂行將至宮門宰  
相傳勅賜皇后勅徧及送者既至楊隱率皇族奉迎再



拜車至便殿東南七十步止惕隱夫人請降車負銀鑿  
捧勝復黃道行後一人張羔裘若襲之前一婦人捧鏡  
却行置鞍于道后過其上乃詣神主室三拜南北向各  
一拜酌酒向謁者一拜起居訖再拜次詣舅姑御容拜  
奠酒選皇族諸婦宜子孫者再拜之授以罍勝又詣諸  
帝御容拜奠酒神賜襲衣珠玉佩飾拜受服之后姊后  
妹陪拜者各賜物皇族迎者后族送者徧賜酒皆相偶  
飲訖后坐別殿送后者退食于次媒者傳旨命送后者  
別于殿北俟皇帝卽御坐選皇族尊者一人當輿坐主  
婚禮命執事者往來致詞于后族引后族之長率送后  
者升當御坐皆再拜又一拜少進附奏送后之詞退復

位再拜后族之長及送后者向當輿者三拜南北向各一拜向謁者一拜后族之長跪問聖躬萬福再拜復奏送后之詞又再拜當輿者與媒者行酒三周命送后者再拜皆坐終宴翌日皇帝晨興詣先帝御容拜奠酒訖復御殿宴后族及羣臣皇族后族偶飲如初百戲角觝觸馬較勝以爲樂又翌日皇帝御殿賜后族及嬪送后者各有差受賜者再拜進酒再拜皇帝御別殿有司進皇后服飾之籍酒五行送后者辭訖皇族獻后族禮物后族以禮物謝當輿者禮畢

冊皇后儀 至日北南臣僚內外命婦詣端拱殿幕次皇后至閤侍中奏中嚴引命婦班入就東西相向位立

皇帝臨軒命使發冊使副押冊至端拱殿門外幕次侍中奏外辦所司承旨索扇扇上舉麾樂作皇后出閣升坐扇開捲簾偃麾樂止引命婦合班面殿起居八拜皇后降坐樂作至殿下褥位樂止引冊入置皇后褥位前侍中傳宣皇后四拜命婦陪位皆拜引讀冊官至皇帝褥位前俛伏跪讀訖皇后四拜陪位者皆拜引皇后升殿使臣引冊置皇后坐前冊案退西向侍立命婦當殿稱賀四拜引班首東階上殿致詞訖東階下殿復位四拜侍中奏宣答稱有教旨四拜宣答訖四拜班首上殿進酒皇后賜押冊使副等酒訖侍中奏禮畢承旨索扇樂作皇后起入閣樂止分付命婦東西門出

賀生皇子儀 其日奉先帝御容設正殿皇帝御八角  
殿升坐聲警畢北南宣徽使殿階上左右立北南臣僚  
金冠盛服合班入班首二人捧表立讀表官先于左階  
上側立二宣徽使東西階下殿受表捧表者跪左膝授  
訖就拜興再拜各祇候二宣徽使俱左階上授讀表官  
讀訖揖臣僚鞠躬引北面班首上殿欄內稱賀訖引左  
階下殿復位舞蹈五拜禮畢

冊皇太子儀 前期一日設帳座于宣慶殿設文武幕  
次于朝堂并殿庭板位太樂令陳官縣皆如皇帝受冊  
儀守宮設皇太子次于朝堂北西向乘黃令陳金輅朝  
堂門外西向皇太子儀仗笳簫鼓吹等陳宣慶門外典

儀設皇太子版位于殿橫街南近東北向設文武官五品以上位於樂縣東西餘官如常儀至日門下侍郎奉冊中書侍郎奉寶綬各置于案令史二人絳服對舉案立寶案在橫街北西向冊案在北門下侍郎中書皆立案後侍中板奏中嚴皇太子遠遊冠絳紗袍乘珪出太子舍人引入就版位東面殿立東宮官三師以下皆從立皇太子東西南向太子入門樂作至位樂止典儀贊皇太子再拜中書令立皇太子東北西向門下侍郎引冊案中書侍郎取冊進授中書令退復位傳宣官稱有制皇太子再拜傳宣訖再拜中書令跪讀冊訖俛伏興皇太子再拜受冊退授左庶子中書侍郎取寶進授中

書皇太子進受寶退授左庶子中書令以下退復位昇  
案者以案退典儀贊再拜皇太子拜在位者皆再拜太  
子舍人引皇太子退樂止侍中奏禮畢皇太子升金輅  
左庶子以下夾侍儀仗鼓吹等並列宣慶門外三師三  
少諸宮臣于金輅前後道從鳴鑾而行還東宮宮庭先  
設儀仗如式至宮門鑾止皇太子降金輅舍人引入就  
位坐文武宮臣序班稱賀禮畢

冊王妃公主儀 至日押冊使副并讀冊等官押冊東  
便門入持節前導至殿冊案置橫街北少東引使副等  
面殿立而鞠躬侍中臨軒稱有制皆再拜鞠躬宣制訖  
舞蹈五拜引冊于宣慶門出使副等押領儀仗冊案赴

各私第廳前向闕陳列設傳宣受冊拜褥冊案置褥左  
去幕蓋使副案右序立受冊者就位立傳宣稱有制再  
拜宣制畢昇冊人舉冊匣于褥前跪捧引讀冊者與受  
冊者皆俛伏跪讀訖皆俛伏興受冊者謝恩國王五拜  
王妃公主四拜若冊禮同日先上皇太后冊寶次臨軒  
同制遣使冊皇后諸王妃公主次冊皇太子

公主下嫁儀 選公主諸父一人爲婚主凡當與者媒  
者致詞之儀自納幣至禮成大約如納后儀擇吉日詰  
旦媒者趨尚主之家詣宮喚皇帝皇后御便殿率其族  
人見進酒訖命皇族與尚主之族相偶飲翌日尚主之  
家以公主及婿率其族入見致宴于皇帝皇后獻饗送

者禮物畢朝辭賜公主青轎車二螭頭蓋部皆飾以銀  
駕馳送終車一車樓純錦銀螭懸鐸後垂大纛駕牛載  
羊一謂之祭羊擬送之具至覆尸儀物俱在賜其婿朝  
服四時襲衣鞍馬凡所須無不備皇族一人送至其家  
親王女封公主者婚儀類此以親疎爲等殺

宋使見皇帝儀 宋使賀生辰正旦至日臣僚昧爽入  
朝使者至幕次奏班齊聲警皇帝升殿坐宣徽使押殿  
前班起居畢捲班出契丹臣僚班起居畢引應坐臣僚  
上殿就位立其餘臣僚不應坐者並退于北面侍立次  
引漢人臣僚北洞門入面殿鞠躬舍人鞠躬通某官某  
以下起居皆七拜畢引應坐臣僚上殿就位立引首相



南階上殿奏宋使并從人膀子就位立臣僚並退于南  
面侍立教坊入起居畢引南使副北洞門入丹墀內面  
殿立閣使北階下殿受書匣使人捧書匣者跪閣使指  
笏立受于北階上殿欄內鞠躬奏封全訖授樞密開封  
宰相對皇帝讀訖舍人引使副北階上殿欄內立揖生  
辰大使少前俛伏跪附起居俛伏興復位立大使俛伏  
跪奏訖俛伏興退引北階下殿揖使副北方南面鞠躬  
舍人鞠躬通南朝國信某官某以下祗候見起居七拜  
畢揖班首出班謝面天顏舞蹈五拜畢出班謝遠接御  
筵撫問湯藥舞蹈五拜畢贊各祗候引出歸幕次閣使  
傳宣賜對衣金幣勾從人以下入見舍人贊班首姓名

以下再拜不出班奏聖躬萬福贊再拜稱萬福贊各祇  
候引出舍人傳宣賜衣使副并從人服賜衣畢舍人引  
使副入丹墀內面殿鞠躬舍人贊謝恩拜舞蹈五拜畢  
贊上殿祇候引使副南階上殿就位立勾從人入贊謝  
恩拜稱萬歲贊有勅賜宴再拜稱萬歲贊各祇候承受  
官引北廊下立御牀入大臣進酒皇帝飲酒契丹舍人  
漢人間使齊贊拜應坐并侍立臣僚皆拜稱萬歲贊各  
祇候卒飲贊拜應坐臣僚皆拜稱萬歲贊各就坐行酒  
親王使相使副共樂曲若宣令飲盡並起立飲訖放殘  
就位謝贊拜並隨拜稱萬歲贊各就坐次行方裊地坐  
臣僚等官酒若宣令飲盡贊謝如初殿上酒一行畢贊

廊下從人拜稱萬歲贊各就坐若傳宣令飲盡並拜稱  
萬歲贊各就坐殿上酒三行行茶行散行饌酒五行候  
曲終揖廊下從人起替拜稱萬歲贊各祇候引出曲破  
臣僚并使副並起鞠躬贊拜應坐臣僚使副皆拜稱萬  
歲贊各祇候引使副南階下殿丹墀內舞蹈五拜畢贊  
各祇候引出次引衆臣僚下殿畢出報閣門無事皇帝  
起聲蹕

曲宴宋使儀 昧爽臣僚入朝宋使至幕次皇帝升殿  
殿前教坊契丹文武班皆如初見之儀宋使副綴翰林  
學士班東洞門入面西鞠躬舍人鞠躬通文武百僚臣  
某以下起居七拜謝宣召赴宴致詞訖文武五拜畢贊

各上殿祇候舍人引大臣使相宗僚使副及方朔朵殿  
應坐臣僚並於西階上殿就位立其餘不應坐臣僚並  
於西洞門出勾從人入起居謝賜宴兩廊立如初見之  
儀兩人監錢教坊再拜贊各上殿祇候入御牀大臣進  
酒舍人閣門贊拜行酒皆如初見之儀次行方朔朵殿  
酒傳宣飲盡如常儀殿上酒一行畢兩廊從人行酒如  
初殿上行餅茶畢教坊致語揖臣僚使副并廊下從人  
皆起立候口號絕揖臣僚等皆鞠躬贊拜殿上應坐并  
侍立臣僚皆拜稱萬歲贊各就位次贊廊下從人拜亦  
如之歇宴飲臣僚起立御座出皇帝起入閣引臣僚東  
西階下殿還幕次內賜花承受官引從人出賜花亦如

之簪花畢引從人復兩廊位立次引臣僚使副兩洞門入復殿上位立皇帝出閣復坐御牀入揖應坐臣僚鞠躬贊拜稱萬歲贊各就坐贊兩廊從人亦如之行單茶行酒行饍行果殿上酒九行使相樂曲聲絕揖兩廊從人起贊拜稱萬歲贊各祇候引臣僚使副東西階下殿契丹班謝出漢人并使副班謝宴舞蹈五拜畢贊各好去引出畢報閣門無事皇帝起

宋使賀生辰朝辭皇帝儀 臣僚入朝如常儀宋使至幕次於外賜從人衣物皇帝升殿宣徽契丹文武班起居上殿如曲宴儀中書令奏宋使副并從人朝辭勝子畢臣僚並于南面侍立教坊起居畢舍人引使副六人

北洞門入丹墀北方面南鞠躬舍人鞠躬通南朝國信  
使某官某以祇候辭再拜起居戀闕如辭皇太后之義  
贊各祇候平身立揖使副鞠躬宣徽贊有勅使副再拜  
鞠躬平身立宣徽使贊各賜卿對衣金帶足段弓箭鞍  
馬等想宜知悉使副平身立揖大使三人少前俛伏跪  
搯笏閣門使授別錄賜物過畢俛起復位揖副使三人  
受賜亦如之贊謝恩舞蹈五拜贊上殿祇候舍人引使  
副南階上殿就位立引從人贊謝恩再拜起居再拜贊  
賜宴再拜皆稱萬歲贊各祇候承受引兩廊立御牀入  
皇帝飲酒舍人閣使臣僚使副再稱萬歲皆如曲宴應  
坐臣僚拜稱萬歲就坐行酒樂曲方茵兩廊皆如之行

穀行茶行饍亦如之行饅頭畢從人起如登位使之儀  
曲破臣僚使副皆起立拜稱萬歲如辭太后之儀使臣  
下殿舞蹈五拜贊各上殿祗候引北階上殿欄內立揖  
生辰正旦大使二人少前齊跪受書畢起立揖磬折受  
起居畢退引北階下殿丹墀內並鞠躬舍人贊各好去  
引南洞門出次引殿上臣僚南北洞門出畢報閣門無  
事

宋使見皇太后儀 宋使賀生辰正旦至日臣僚昧爽  
入朝使者至幕次臣僚班齊皇太后御殿坐宣徽使押  
殿前班起居畢捲班次契丹臣僚班起居畢引應坐臣  
僚上殿就位立其餘臣僚不應坐者退於東面侍立漢

人臣僚東洞門入面西鞠躬舍人鞠躬通某以下起居  
凡七拜畢贊各祗候引應坐臣僚上殿就位立中書令  
大王西階上殿奏宋使并從人勝子訖就位其餘臣僚  
不應坐者退於西面侍次引宋使副六人於東洞門入  
丹墀內面殿齊立閤使自東階下受書匣使人捧書匣  
者皆跪閤使惜笏立受書匣自東階上殿欄內鞠躬奏  
封全訖授樞密開封宰臣對皇太后讀訖引使副六人  
跪附起居訖起復位立次引賀太后正旦大使附起居  
如前儀皇太后宣問南朝皇帝聖躬萬福舍人揖生辰  
大使并皇太后正旦大使少前皆跪惟生辰大使奏來  
時聖躬萬福皆俛伏興引東階下殿丹墀內面殿齊立



引進使引禮物于西洞門入殿前置檐牀控鶴官起居  
四拜檐牀於東便門出畢揖使副退於東方西面皆鞠躬  
舍人鞠躬通南朝國信使其官某以下祇候見舞蹈  
五拜畢不出班奏聖躬萬福再拜揖班首出班謝面天  
顏訖復位舞蹈五拜畢贊各上殿祇候引各使副西階  
上殿就位勾從人兩洞門入面殿鞠躬通名贊拜起居  
四拜畢贊各祇候分班引兩洞門出若宣問使副跋涉  
不易引西階下殿丹墀內舞蹈五拜畢贊各上殿祇候  
引西階上殿就位立契丹舍人漢人閣使齊贊拜應坐  
臣僚應拜臣僚并使副皆拜稱萬歲贊各就坐行湯行  
茶出殿門揖臣僚并使副起鞠躬契丹舍人漢人閣使

齊贊皆拜稱萬歲贊各祇候先引宋使副西階下殿西洞門出次揖臣僚出畢報閤門無事皇太后起

宋使朝辭太后儀 臣僚使副班齊如曲宴儀皇太后升殿坐殿前契丹文武起居上殿畢宰臣奏宋使副從人朝辭勝子畢就位立舍人引使副北洞門入面南鞠躬舍人鞠躬通南朝國信使某官某以下祇候辭再拜不出班奏聖躬萬福再拜出班戀闕致辭訖又再拜贊各上殿祇候舍人引南階上殿就位立引從人贊姓名再拜稱聖躬萬福再拜稱萬歲贊各好去引出殿上揖應坐并使副就位鞠躬贊拜稱萬歲贊各就坐行湯行茶畢揖臣僚并南使起立與應坐臣僚鞠躬贊稱萬歲

贊各祗候立引使副六人於欄內拜跪受書匣畢直起立揖少前鞠躬受傳答語訖退於北階下殿丹墀內面殿鞠躬舍人贊各好去引出臣僚出

高麗使入見儀 臣僚常服起居應上殿臣僚殿上序立閣門奏勝子引高麗使副面殿立引上露臺拜跪附奏起居訖拜起立閣門傳宣王詢安否使副皆跪大使奏臣等來時詢安引下殿面殿立進奏物入列置殿前控鶴官起居畢引進使鞠躬通高麗國王詢進奉宣徽使殿上贊進奉赴庫馬出檐牀出畢引使副退面西鞠躬舍人鞠躬通高麗國謝恩進奉使其官某以下祗候見拜跪五拜不出班奏聖躬萬福再拜出班謝面天顏

五拜出班謝遠接湯藥五拜贊各祗候使副私獻入列  
置殿前控鶴官起居引進使鞠躬通高麗國謝恩進奉  
某官某以下進奉宣徽使殿上贊如初引使副西階上  
殿序立皇帝不入御牀臣僚伴酒契丹舍人通漢人閤  
使贊再拜稱萬歲各就坐酒三行殺饌二味若宣令飲  
盡就位拜稱萬歲贊各就坐殺饌不贊起再拜稱萬歲  
引下殿舞蹈五拜贊各祗候引出於幕次內別差使臣  
伴燕起宣賜衣物訖遥謝五拜畢歸館

曲宴高麗使儀 臣僚入朝班齊皇帝升殿宣徽教坊  
控鶴文武班起居皆如常儀謝宣宴如宋使儀贊各上  
殿祗候契丹臣僚謝宣宴勾高麗使面南鞠躬舍人鞠

躬通高麗國謝恩進奉使某官某以下起居謝宴共十二拜贊各上殿祇候臣僚使副就位立大臣進酒契丹舍人通漢人間使贊上殿臣僚皆拜贊各祇候進酒大臣復位立贊應坐臣僚拜贊各就坐行酒若宣令飲盡贊再拜贊各就坐教坊致語臣僚皆起立口號絕贊再拜贊各就坐凡拜皆稱萬歲曲破臣僚起下殿契丹臣僚謝宴中書令以下謝宴畢引使副謝七拜贊各好去控鶴官門外祇候報閤門無事供奉官捲班出來日問聖體

高麗使朝辭儀 臣僚起居上殿如常儀閤門奏高麗使朝辭膀子起居戀闕如宋使儀贊各上殿祇候引西

階上殿立契丹舍人贊拜稱萬歲贊各就坐中書以下  
伴酒三行殽饌二味如初見之儀既謝贊有勅宴五拜  
贊各好去引出於幕次內別差使臣伴宴畢賜衣物跪  
受遙謝五拜歸館

西夏國進奉使朝見儀 臣僚常朝畢引使者左入丹  
堦面殿立引使者上露臺立揖少前拜跪附奏起居訖  
俛伏興復位閣使宣問某安否鞠躬聽旨跪奏某安俛  
伏興退復位引左下至丹堦面殿立禮物右入左出畢  
閣使鞠躬通某國進奉使姓名候見共一十七拜贊祇  
候平立有私獻過畢揖使者鞠躬贊進奉收訖贊祇候  
引左上殿就位立臣僚使者齊聲喏酒三行引使左下

至丹墀謝宴五拜畢贊有勅宴五拜祇候引右出禮畢  
於外賜宴客省伴宴仍賜衣物

西夏使朝辭儀 常朝畢引使者左入通某國某使祇  
候辭再拜不出班起居再拜出班戀闕致辭復再拜賜  
衣物謝恩如常儀若賜宴五拜畢贊好去引右出